

Sassaalliisarfiit il.il. matoqqasarfinik allannguigallarneq pillugu Namminersorlutik Oqartussat nalunaarutaat

Nappaatit tunillaassortut akiorniarlugit iliuutsit pillugit Inatsisartut peqqussutaat nr. 20, 12. november 2001-imeersumi, Inatsisartut inatsisaanni nr. 1, 1. april 2020-mi allanngortinneqartumi §§ 6 a, 12 a, 12 b aamma § 29, imm. 2 aamma 3 naapertorlugu, aalajangerneqarpoq:

Atuuffia

§ 1. Nalunaarut Kalaallit Nunaannut tamarmut atuuppoq.

Imm. 2. Nalunaarut Kalaallit Nunaanni Peqqinnissaqarfimmut imaluunniit nakorsiartarfinnut kiisalu nakorsiartarfinnut namminersortunut niuertarfinnilu peqqissaannermik naalagaaffimmit akuerisaallutik ingerlatani ingerlatsisunut atorfeqartitsiffiusunullu atuutinngilaq.

Imm. 3. Nalunaarut katersuunnernut, politikikkut allatulluunniit isummersornissamik sunniiniarnissamik siunertalinnut atuutinngilaq.

Imm. 4. Nalunaarut eqqartuussivinnut atuutinngilaq.

Imm. 5. Nalunaarut namminersortunut pisortaniillu ulluunerani neqeroorutitut, atuarfinnut, ilinniarfeqarfinnut il.il. nappaatit tunillaassortut akiorniarlugit iliuutsit pillugit Inatsisartut peqqussutaanni § 22 naapertorlugu atuutsinngilaq.

Imm. 6. Nunatsinni Nakorsaaneqarfik nalunaarummit immikkut akuersissuteqarsinnaavoq.

Sassaalliisarfinnut il.il. immikkut matusarfiit

§ 2. Sumiiffiit inimi nerisassanik, imigassanik imaluunniit tupamik tunisisarfinmi pinissamut pingaarnertut siunertaqarfusut, imaluunniit imerniartarfinmik, diskotekimik assigisaanilluunniit ingerlatsiffusut nal. 22.00-imit nal. 5.00-imut tamanut matoqqatinneqassapput.

Imm. 2. Init allat, matuma ataani hotelit paarlii, nerisassanik, imigassanik imaluunniit tupamik sassaalliiffusut, nerinissamut imaluunniit imernissamut sassaalliineq piffissami nal. 22.00-imit nal. 5.00-imut matoqqassaaq.

Imm. 3. Imm. 1-imik aamma 2-mik malinninnissamut qulakkeerinninnissamut pisussaataaaffik inimik atuisumiippoq.

Pineqaatissiissutit

§ 3. § 2 naapertorlugu pinerluttulerinermik inatsit naapertorlugu unioqqutitsinermi kinguneqartitsisoqarsinnaavoq.

Imm. 2. Ingerlatseqatigiiffiit il.il. (inatsisitigut pisussaatitaasut pisinnaatitaasullu) pinerluttulerinermik inatsimmi kapitali 5-imi malittarisassat naapertorlugit pinerluttulerineq pillugu inatsiseqartitsinikkut akisussaatinneqarlutik pineqaatissinneqarsinnaapput

Atuutilersitsineq aamma atuunneranut piffissaliussaq

§ 4. Nalunaarut ulloq 11. januar 2022 atuutilerpoq.

Imm. 2. Nalunaarut naapertorlugu killilersuutit, inerteqqutit, peqqussutit il.il. ulloq 25. januar 2022 ilanngullugu atuutissapput.

Namminersorlutik Oqartussat, ulloq 10. januar 2022

Kirsten Fencker sinnerlugu Mimi Karlsen
Peqqinnissamut Naalakkersuisoq

/ Aka Olesen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

